



# Umhverfisstefna Skútustaðahrepps

## Leiðarljós:

Skútustaðahreppur verði til fyrirmyndar meðal íslenskra sveitarfélaga í umhverfismálum þar sem sjálfbær þróun er höfð að leiðarljósi við ákvarðanatöku. Með því verði sveitarfélagið eftirsótt til búsetu sem fjölskylduvænt svæði í heilnæmu umhverfi sem skartar náttúru sem nærir og eykur lífsgæði íbúa og gesta. Inntak umhverfisstefnunnar byggir á væntumþykju, virðingu og mati á þeim verðmætum sem einstök náttúra Skútustaðahrepps er. Áhersla er lögð á gott samstarf við íbúa, landeigendur, fyrirtæki og stofnanir til að greiða leiðina að settum markmiðum. Stefnunni fylgir tímasett aðgerðaáætlun. Umhverfisstefna og tímasett aðgerðaáætlun skulu endurskoðuð í upphafi hvers kjörtímabils. Hluti sveitarfélagsins fellur undir verndarlög um Mývatn og Laxá og er skilgreint sem alþjóðlega mikilvægt votlendi RAMSAR-sáttmálans.

## Meginmarkmið:

### 1. Umhverfisfræðsla

Markmið umhverfisfræðslu er að skapa almenna virðingu fyrir náttúru svæðisins með verndun hennar og sjálfbæra nýtingu að leiðarljósi. Nemendur á leik- og grunnskólastigi fái vandaða kennslu um umhverfismál. Sveitarfélagið miðlar upplýsingum um umhverfismál markvisst til starfsmanna, íbúa og gesta sveitarfélagsins.

### 2. Verndun lífríkis og umhverfis

Virðing er borin fyrir einstöku lífríki og líffræðilegri fjölbreytni svæðisins með tilliti til fuglalífs, gróðurs, jarðvegs, jarðmyndana, vatnsfalla, stöðuvatna og votlendis. Sveitarfélagið sýnir gott fordæmi í umgengni og varðveislu landgæða og hvetur atvinnulíf og almenning að fylgja því fordæmi.

### 3. Skipulagsmál og manngert umhverfi

Sjálfbær þróun og verðmæti landslags eru höfð að leiðarljósi við gerð skipulagsáætlana. Ásýnd byggðar og samspil hennar við umhverfið endurspeglar metnað sveitarfélagsins og skal höfð sem útgangspunktur við hönnun nýbygginga og mannvirkja. Viðhald eldri bygginga og verndun menningarminja skal sinnt af metnaði í sama tilgangi. Áhersla er lögð á gott aðgengi til útivistar, t.d. með stígagerð og merkingum.

Við uppgræðslu og skógrækt er lögð áhersla á það lífríki sem fyrir er og forðast að nota framandi eða ágengar tegundir.



Við skipulagningu á bílaumferð er miðað að því að draga úr hættu á mengunarslysum.

## 4. Auðlindir

Sveitarfélagið leggur áherslu á að ákvarðanir um nýtingu náttúrurauðlinda svæðisins verði ávallt teknar með hliðsjón af hugmyndafræði sjálfbærrar þróunar .

Lögð er áhersla á að draga úr myndun úrgangs í sveitarfélaginu, hjá fyrirtækjum, í verslun, þjónustu og á heimilum. Sérstök áhersla er lögð á endurnýtingu og endurvinnslu úrgangs og jarðgerð á lífrænum úrgangi.

Innkaupastefna sveitarfélagsins tekur mið af umhverfissjónarmiðum og haldið grænt bókhald. Sveitarfélagið lágmarkar notkun pappírs með rafrænni stjórnsýslu. Sveitarfélagið og stofnanir þess munu af fremsta megni nota endurnýjanlegar auðlindir í starfsemi sinni.

## 5. Fráveitumál

Sveitarfélagið leggur áherslu á vistvænar leiðir til að uppfylla lög og reglur um fráveitumál og vera til fyrirmyndar í málaflokknum. Fyrirbyggja skal að mengandi efni berist út í umhverfið, annars vegar með því að hvetja til notkunar á umhverfisvænum efnum og hins vegar tryggja reglulegt eftirlit með frárennslismannvirkjum.

## 6. Heilnæmt umhverfi

Í sveitarfélaginu skal vera greiður aðgangur að hreinu og heilnæmu neysluvatni. Skipulagt eftirlit er með vatnsveitum og vatnsverndarsvæðum í sveitarfélaginu. Tryggja skal íbúum sveitarfélagsins umhverfi til búsetu og útivistar þar sem loft- ljós- og hávaðamengun er í lágmarki. Við útgáfu starfsleyfa til fyrirtækja sem ætla má að geti valdið slíkri mengun skal setja inn vöktunarákvæði sem tryggja að starfsemin sé innan viðmiðunarmarka.

## 7. Loftslagsmál

Helstu vandamál mannkyns á 21. öldinni eru loftslagsbreytingar. Markmið sveitarfélagsins er að rekstur þess verði kolefnishlutlaus 2035 með því að draga úr losun gróðurhúslofttegunda og auka kolefnisbindingu. Sveitarfélagið miðlar upplýsingum um loftslagsbreytingar og aðgerðir til að daga úr þeim og hvetur starfsmenn og íbúa til að leggja sitt af mörkum.